



Na: Kolegio Ehekutivo di Entidat Públiko Bonaire  
N.a.d. e Diputado enkargá ku e.o. Finansa  
Señor C. Abraham

Fecha: 10 di mei 2024

Tópiko: Preguntanan conforme art. 46 RvO tokante desaprobashon 1<sup>e</sup> kambio di presupuesto 2024

Apresiabel diputado,

Ku profundo preokupashon i un grado di desepshon e frakshon di MPB a tuma nota di e karta di sekretario di estado fechá 7 di mei 2024, ku kua ta desbaratá enfátikamente i ta desaprobá rotundamente e promé kambio di presupuesto 2024.

Ta klaro ku e kambio di presupuesto akí, conforme e lei 'Wet financiën openbare lichamen BES (FinBES)', no ta kumpli ku e rekisitonan stipulá, manera Cft BES a remarká. E kambio di presupuesto ta mustra un defisiensia preokupante di kumplimentu ku e lei di FinBes i ku e Dekreto di presupuesto i responsabilisashon di Entidatnan Públiko BES (BBV BES).

Ta teribel ku e promé kambio di presupuesto no ta kumpli ku ningun di e rekomendashonnan ku Cft a stipulá, manera nan konseho ta indiká. Apesar di promesanan anterior pa aklará desviashonnan di e konseho di Cft, Kolegio Ehekutivo no a kumpli ku ehekushon di esaki a base di implementashon na forma di un proseso, loke ta un violashon fragante di e Lei di FinBES.

No ta akseptabel ku Cft no a risibí un akklarashon suficiente di e proposishonnan di kitamentu di reserva general i reserva apuntá, di manera ku nan no por a evaluá esakinan segun e rekisitonan proponé den FinBES. Ademas ta irresponsabel ku no ta spesifiká kompra stratégiko di bien inmóbil i asuntunan relashoná ku esaki, manera Cft ta konsehá.

En bista di loke ta mensioná akiriba i tumando na konsiderashon artíkulo 45 di Reglamentu di Órden, ku conforme esaki ta deseá di haña kontesta oral den e promé siguiente reunion, ta presentá na bo e siguiente preguntanan.

1. Kua pasonan bo ta konsiderá di tuma pa sòru ku e kambio di presupuesto ta kumpli ku e areglo di lei i regulashon?
2. Kua medidanan bo ke tuma pa sòru ku Konseho Insular den futuro ta mihó embolbí den e proseso di kambio di presupuesto?
3. Na ki forma bo ke mehorá e manera di kontrolá e presupuesto i e akklarashon di sakamentu for reservanan, manera Cft ta proponé?
4. Ki reakshon bo tin riba e konseho di Cft pa e sakamentu proponé for di reserva general pa kompra stratégiko for di e konsepto di kambio di presupuesto?
5. Kon bo ta mira e funshon di Cft den garantisá integridat i responsabilidad denter e Entidatnan Públiko di Bonaire, Sint Eustatius i Saba?
6. Kua konsekuensia bo ta mira pa aprobashon i balides legal di e kambio di presupuesto 2024 awor ku no a duna aprobashon na esaki?
7. Kua medida bo ta tuma pa garantisá ku den futuro ta sigui e rekomendashonnan di Cft i ta prevení ripitishon di e situashon akí?
8. Denter di kua periodo Konseho Insular por spera un programa di presupuesto di manera ku Konseho Insular por ehersé su tareanan di kontrol manera esaki mester ta?

Den su karta di 3 di mei 2024 (numerá 202400048) Cft ta stipulá ku Boneiru tin e abilidad di entregá e informashon nesessario pa evaluashon di e 1<sup>e</sup> uitvoeringsrapportage pa aña 2024.

9. Dikon e 1<sup>e</sup> uitvoeringsrapportage no ta kontené sifra di realisashon basá riba e kompartishon funshonal, meskos tambe un resúmen di e kobransanan lokal i dikon no ta duna informashon tokante e desaroyo relashoná ku e maneho finansiero?
10. Dikon Cft ta preokupá tokante e realisashon atrasá relashoná ku e forsa di implementashon di e entidat públiko, i ku esaki tambe tokante e nivel di faktibilidad di e presupuesto? Kua medidanan bo ta tuma pa koregí esaki òf pa suavisá esaki?

Den e presentashon di e 1<sup>e</sup> kambio di presupuesto na Konseho Insular no a duna akklarashon dikon no a tene kuenta ku e konklushonnan i rekomendashonnan di Cft, manera den artíkulo 17 insiso 3 di Lei di FinBES ta preskribí. Ta te despues ku Konseho Insular a stipulá e kambio di presupuesto, riba 19 di aprel 2024, Konseho Insular i Cft a risibí un reakshon di Kolegio Ehekutivo di Boneiru riba e konseho di Cft tokante e 1<sup>e</sup> kambio di presupuesto 2024. Den e reunion en kuestion bo persona a enfatisá fuertemente ku e kambionan tabata solamente di índole tékniko.

11. Bo por imaginá i realisá bo mes ku Konseho Insular ta sinti su mes sumamente engańá den e kaso lamentabel akí ku e konsekuensia un pèrdida drástiko di konfiansa entre bo persona ku Konseho Insular?

12. Kua tabata bo konsiderashonnan pa keda sin duna informashon krusial na Konseho Insular?

En espera di un kontesta di bo banda mi ta sera,

Atentamente,

H. Wout

Lider di Frakshon di MPB